



Fotos raquintadas da Katharina Vonow

L'artista e fotografa ha relatà a Tussàn da sia lavur che ha manà ella per l'entir mund enturn.

6



Cussegls da la plaiv, dovri insumma tals?

Suenter la fusiun dals cumegn-baselgia daventa il tema puspè actual er en Surses.

11

südostschweiz

LA QUOTIDIANA

Redacziun: Via Sommerau 32, 7007 Cuira, tel. 081 255 57 10, redacziun@laquotidiana.ch

Mustér: La Dertgira nauscha ha priu sias sentenzias

■ (anr/hh) La sera dil gliendis tscheiver s'auda a Mustér alla Dertgira nauscha. Per la 29avla ga ha quella publicau sias sentenzias. Ella ha tematisau la cultura, la hotellaria, l'economia, la politica, mo era schabetgs ellas vischnauncas vischinontas. Sco ei para ha ella giu bia lavur, pertgei ils schabetgs en ed entuorn vischnaunca empleinan pliras paginas. Ella sentenziescha quei ch'ei iu crutsch e dat cussegls per mi-

gliurs ed innovaziuns pusseivlas. Pendiu vid la fuortga ha ella uonn ils negaholics. Quei ein personas che han da tagnar e far encunter a tut ed aunc dapli. Sco exempels persuenter numna la Dertgira nauscha il na al Parc Adula, ils giugs olimpics ni era l'opposiziun enviers autras ideas e projects. Quei negativissem stoppi prender ina fin.

> PAGINA 3

Scuol: Ouvras da Constant Könz

■ (anr/fa) Illa partizun da medicina complementara da l'ospital a Scuol sun exposts pel mumaint purtrets e disegns da l'artist Constant Könz. A la vernissascha ha'l dit co cha seis purtrets naschan. Üna trentina da personas han tut part in dumengia a la vernissascha da l'exposiziun dad obras da Constant Könz. I'ls pier-tans e differents locals da la partizun medicina complementara

vegnan muossats 25 purtrets gronds, ils blers da la perioda dals ons 1970 ed 80, ed üna trentina da disegns ch'el ha fat i'ls ultims quatter fin tschinch ons. «Da desch purtrets ch'eu fetsch pittura nouv darcheu suraint, quels svanisch darcheu», ha dit l'artist, «i nu grata adüna ch'ün purtret am satisfac, l'inspiraziun es ün regal.»

> PAGINA 9



L'autura Marcella Pult e Constant Könz culla monografia davart l'artist engiadinais.

FOTO F. ANDRY

La liquidaziun da la Piz Tschütta SA a Vnà

■ (anr/afi) Avant pacs dis ha publichà il tribunal regional Engiadina Bassa Val Müstair l'introducziun dal fallimaint da la Piz Tschütta SA. Quella vegn uossa scholta e la liquidaziun vegn fatta tenor las prescripziuns dal concuors. Schi nu dà infra ils prossems trenta dis ingiuns recuors cunter quista decisiun vegn l'uffizi incumbenzà cul concuors. Tant Urezza Famos, üna da las iniziandas dal projet da l'hotel de-

central a Vnà, sco eir il rapreschantant d'üna gronda part dals acziunaris, Jörg Honegger, deploreschen quist pass. Famos vaiva provà insembel cun Ruedi Brunner da salvar amo quei chi d'eira pussibel. Ün dals divers motifs pel naufragi da la Piz Tschütta SA es, tenor ella, tanter oter la mancanza da sustegn da vart dals partenaris dal projet a Vnà.

> PAGINA 9

Midada tier apteca Flem

■ (anr/abc) Dapi 34 onns meinan Jolanda e Beat Erb ina apteca e drogaria a Flem. Igl onn 1983 haveva il giuven per surpriu l'apoteca Baud a Flem Casa d'Uaul. Igl onn 2000 ha els bardigliu da Flem Casa d'Uaul a Flem Vitg. Quei medem onn ha Coop fundau en Svizra ina atgna cadeina d'apotecas. Cun num Coop Vitality meina il distributur grond oz varga 70 apotecas ell'entira Svizra cun varga 800 collaboraturas e collaboraturs. Igl 1. da november 2017 vegn Coop Vitality a surprendre il menaschi el Curtgin Capol e l'apoteca Jolanda Erb daventa meinafiliala.

> PAGINA 5

Venavant ainten la 2. ligia

■ (anr/gns) Anc restan dus gis dalla runda da relegaziun è siva da sonda passada è cler tgi Lai/Valbella ò betg da far igl zap dalla 2. ligia ainten la ligia pi bassa. Igl Surmirans on gudagnea orsouira cunter Ascona 5:2 e cun la quarta victorgia an seria fatg sez igl fundamaint per restar ainten la 2. ligia.

> PAGINA 12

Almain in dunna

La mancanza da dunnas en la politica sa fa vesair a la tschern da candidatas

DAD ANDREAS CADONAU

■ La cumpart da dunnas en la politica stagnescha. In problem che daventa acut sch'i sa tracta da chattar dunnas prontas da candidar per in uffizi executiv. La presidenta da la Centrala da dunnas fa valair mancanza da promozion da la dunna en la politica. Per Cathrin Räber, presidenta da la Centrala grischuna da dunnas, è il problem enconuschent dapi decennis. Cumbinar professiun ed engaschi public cun la lavur da famiglia saja grev per ina dunna, principalmain en il Grischun per mancanza da las structuradas adattadas. Ed ella rinfatscha a las partidas politicas da na promover las dunnas a lunga vista e stgaffir in profil da candidar per in uffizi executiv. Da motivar ina dunna per quel uffizi executiv en la regenza grischuna n'è betg reussi a la Partida socialdemocratica. In'egliada en las retschas da las partidas burgaisas indichescha dabler potenzial da futuras candidatas, na dal dumber da dunnas en la politica è la schelta limitada. Gist la Partida burgais-democratica che ha da remplazzar la cussegliera gover-



La prontad da candidar per la regenza grischuna na para betg dad esser fitg gronda tar las dunnas.

FOTO M. HARTMANN

nativa Barbara Janom Steiner en las proximas elecziuns chantunales da la primavaira 2018 vegn ad avair tscherts problems da motivar e

chattar ina dunna pronta da candidar per cas che la partida vul insumma. Quai malgrà che las dunnas da la pbd èn bainvestidas tar l'electoral

feminin burgais che nun è lia direct ad ina partida.

> PAGINA 2

«Sedia: Hohenbühlweg 4»

La GiuRu ha uss in agen domicil a Cuera

■ (anr/abc) Dapi 25 onns s'engascha l'union Giuventetgna Rumantscha, enconuschenta culla scursaniziu GiuRu, pils interess specifics. Dacuort ha ella survegni in agen domicil. In quart tschentaner ha ei cuzzau tochen che la GiuRu ei stada maiorenna. La GiuRu ha dapi igl

1. da fevrer 2017 sia sedia al Hohenbühlweg 4 a Cuera. Igl ei la streglia gest davos l'ustria Zollhaus, visavi la Porta sura. En siu 26avel onn d'existenza ha ella in agen dacasa. Miez fevrer ei la supprastonza dalla GiuRu s'entupada per l'emprema gada leu. A scolaras e scolar romontschs dalla

scola cantunala porscha il domicil dalla GiuRu ina nova caschun. Per l'ina vegn il Hohenbühlweg 4 ad esser in liug da s'entupar per giuventetgna da tuttas valladas romontschas. La scola cantunala ei buca lunsch naven.

> PAGINA 3



Ella capitala dils Romontschs, a Cuera, ha era la GiuRu uss in agen dacasa.

FOTO Y. BOLLHALDER



20009

Servetsch d'abunents e da distribuziun: tel. 0844 226 226 mail: abo@somedia.ch

9 771424 749004